



PAMFLET

690







Cort verhael

T 277

**Vande Moort/ ghedaen**  
aen den persoone vanden seer  
Dooxluchtighen Prince  
van Orangien.



ANNO M. D. LXXXIIII.

690  
17

Cori Verhael

Standaard-Verhael

aan den verlosser menschen

door den Heiligen Geest

van den Heiligen



ANNO M. D. LXXXIII



Een verhael  
Vande Moort/ ghedaen aen den  
persoone vanden seer Doorzluch-  
tighen Prince van Orangien.



Et mach wel wesen dat veel  
personen/ vande gene die ge-  
weest hebben op de plaetsen  
daer de moort heeft bedreuen  
gewest inde persoone vanden  
seer Doorzluchtigē Prince van  
Orange/te rechte g'informeert  
sijn vanden aetheur/beleiders  
ende volbrengers van een soo  
seer deerlick seyt: ghelijck oock  
wel soude moghen ghebeuren/  
dat de ghene die verre vande  
sehe plaetse woonachtich sijn/ iae dat meer is/ dat die  
van dese landen / soudē anders g'informeert sijn van-  
de sake/ dan wel waerachtich is. Ende met meerder re-  
den soo soudē ons nacomers in perijckel sijn/ van daer  
in te vinden niet dan een groote duysternisse/inde welc-  
ke de luegen meestendeel de staet grijpt van de waer-  
heyt/ende het onwaerachtich van het waerachtich. Het  
is waerachtich dattet is een ghemeyne spreckwoort/  
Dat de waerheyt is de dochter vanden tijdt: het welc-  
ke ick in veel andere saken bekenne waerachtich te sijn:  
maer in dusdanighe gheballen/ door de welcke de lieden  
met eeren quervallen ende verdrukt worden / gebeurt  
dickwils dat de ghedenckenisse van een eerlijck ende  
broom man verdrukt wort / ende ter contrarie dat de  
boose mensche verheuen wordt tot hoogen staet / ende  
grootelijck geacht wort/ oft ommeers ten minsten dattet



seer langhe loopt / eer dat de waerheyt alle menschen  
soude moghen vooz ooghen comen. Ick en laet my niet  
duncken datmen soude moghen het een ende het ander  
quaet beter beletten ende beteren / dan deur een waer-  
achtighe beschrypinghe van de saken die gheschiet sijn:  
de welcke niet en kan wel ghedaen worden/dan door de  
ghene die daer tegenwoordich sijn gheweest/ ende ghe-  
lijck aensienders van alle het ghene dat in alsulcken  
seften ghebeurt is. Ende hoe wel dat my niet onbe-  
kent en is/dat de waerheyt van de gheschiedenissen den  
naecomers seer wel dient ende te passe coemt / vooz de  
welcke alle vrome personen behooren soze te dragen/  
nochtans soo dunckt my/dat een peggelick behoort sijn  
beste te doen / om behulpich te wesen de lieden van sui-  
nen tijdt/ ende sonderlinghe den gheenen die een loflic-  
ke ende deuchdelicke sake dypuen : ghemerckt dat vooz  
alle andere saecken merck van noode is tegenwoordich-  
lijck sozge te draghen vooz het teghenwoordich goet/  
ende daer aen de handt te houden. Want aengacnde  
het toecomende goet/ wy en connen daer in niet dienen/  
dan door een voozienighe wijsheyt / van de welcke het  
eynde meestendeel onsker is: merck de teghenwoordige  
effecten brenghen de ghemeyne sake een sekerder pro-  
fijt by. Daer en tusschen soo behoort als vooz het tweede  
elck vroom man sijn beste te doen om den naecomers/  
soo seer als hem moghelijck is nut ende profytelijck te  
wesen. Ende om dese twee oorsaken/ soo heeft my ghe-  
docht nut ende goet te wesen/ dit seft datter ghebeurt  
is in het licht te brenghen: waer af de circumstantien  
veel menschen/ die binnen dese stadt van Delft sijn/ wel  
bekent sijn/ de welcke dit gheschift lesende bekennen  
sullen de waerheyt van t gene dat sy gehoozt ende ghe-  
sien hebben: Ende ghemerckt dat de waerheyt geen luy-  
ster en wil nemien dan van haer seluen/ soo sal oock dese  
beschry-



Beschryuinghe licht ende sonder eenich circaet sijn/ ende  
niet dan een naect/ nochtans waerachtich verhael van  
de saken die gebeurt sijn. Gheheel Christenryck mach  
ghedachtich wesen/ het moordadich seyt bedreuen aen  
den persoone vanden seer Doozluchtighen Prince/ by  
Jaureguy ghebozen Biscapen/ nu twee iaren ghele-  
den/ oock is alle man bekend door de belydinge vande  
medeplichters vanden seluen Jauregui/ dat dit voorstel  
was belept ende ghedreuen door den Coninck van  
Spaignien/ ende zyn principaelste Officiers en Ampt-  
lieden/ ten eynde dat hy/ niet connende ten eynde co-  
men van sijn voornemen/ teghen den seer Doozluchtig-  
hen Prince/ by de ghewoonelijcke middelen die onder  
alle Vorsten gebruyct worden/ versoeken soude daer  
toe te geraken door middelen die door tyrannen ende  
moorders voortghekeert waren. Soo nu den seluen  
aenslach niet en was gheuallen gelijk hy wel begeer-  
de/ soo en hebben hy ende sijn toeghemaeete personen  
gheensins op ghehouden van te veruolghen henlieder  
voornemen/ proeuede den Prince ter doot te brenghen/  
als nu door sijn/ als dan metten sweerde: Ende hoe  
wel dat waerschnich ghenoech is/ dat sy verscheyden  
aenslaghen voorgenomen hebben/ die niet en sijn ghe-  
comen tot kennisse vanden Prince/ nochtans soo heb-  
ben hen sommighe claerlijck ontdeckt geweest/ ende oock  
eenige van dien allen menschen. Eerste wel mercke-  
lijcken aenslach was/ die Salsedo socht te volbrengen  
oft doen volbrenghe ouer twee iaren binnen de stadt  
van Brugghe/ welcken Salsedo daer toe gehuert was  
van Alexander Farnese Prince van Parma: Daer al-  
soo desen aenslach ontdeckt heeft gheweest/ soo sijn oock  
de proceduren die daer wt ghewolcht sijn/ ende het eyn-  
de vanden seluen Salsedo een peggelijck ghenoech be-  
kent/ soo dat daerom niet en is van noode/ langer daer



mede besich te bliuen. Daer nae isser gheweest een ander ghenoeemt Peeter R. de welcke nae dat hy veel landen doorloopen hadde/ ende voorts door Greuelinghen ghepasseert hebbende/ waer dat hy met La-Motte/ Gouverneur van de selue plaetse vande sake ghesproken hebbende/ ten laetsten gecomen sijnde binnen Antwerpen/ ende wt eenich bemooden gheuanchen sijnde/ bekent ende gheleden heeft / dat hy met den Coninck van Spaignien in persone in enen hof ghesproken ende ghehandelt hadde/ ende met hem den coop ghesloten van te vermoorden desen seer Doorluchtighen Prince. Noch heeft nu onlanc een ander aenslach ontdeckt ende ghestraft gheweest binnen Vlissingen. Oock heeft onlanc de Fransche Capiteyn Gott/ gheuangen sijnde in eenich seyt van oorloghe ontrent ter Neusen/ ghelept gheweest voor den Burckgraue van Ghent/ nu ter tijt genoemt den Marcgraue van Roubaix/ de welcke nae veel dreyghementen/ ten laetsten den seluen Capiteyn heeft voor ghehouden/ dat hy hem soude laten los ende vry gaen/ iac seer wel doen vergelden/ ende versekerheyt geuen vanden Prince van Parma/ so verre hy eenighen goeden dienst doen woude. Desen Capiteyn siende hem seluen in perijckel/ ten minsten van scherper gheuangenisse/ door dien dat hy eertijts door swimmen wt henlieder handen gheraect was/ vzaechde hem/ wat dienst dat hy van hem soude begheren / ende in dien hy de selue soude moghen doen / dat hijt doen soude. De Marcgraue vzaechde hem/ oft hy niet en soude connen ouerghenuen de stercke van ter Neusen: waer op hy hem antworde/ Neen: nuds dat hy anders geen ghebot en hadde dan ouer een Vendel/ ende datter meer ander in garnisoen laghen: te meer oock om dat hy soo veel ghesloofs niet en hadde by sijn volck / om henlieden te moghen brenghen om sulcx te doen/ want hy en woude niet gheloe-



ghelouen dat hy niet en mocht houden. De Marcgraue  
vraechde hem / oft hy hem niet en soude connen meester  
makē van een seker bollewerck / daer hy hem soude mo-  
ghen met ses hondert mannen bystant doen: want men  
hadde hem verskert dat hy met soo veel mannen hem  
seluen mocht meester maken vande plaetse. waer op  
hem gheantwoort wert / dat hy met geen twee duysent  
mannen sulcx doen soude / ende dat hy in alsulcken sake  
niet en soude connen doen den dienst die men op hem be-  
geerde. De Marcgraue heeft hem nae veel harde ende  
straffe woorden vooz dese reyse daer ghelaten. Op een  
ander tijt heeft hy hem weder by hem doen comen ende  
ghebzaecht / aengesien dat hy alsulcken dienst niet doen  
en conde / oft hy niet en soude mogen een ander doen op  
den persoon vanden Prince / ende oft hy geenen toe-  
ganck en hadde ten Houe: Hy antwoorde hem / Jae ge-  
lijck alle Capiteynen daer willecome waren / maer dat  
hy daer sonderlinge kernisse hadde / ende dat den Prin-  
ce seer geerne etende was een seker pottagie gecocht met  
palingen / soo dat hy wel middel soude vinden om fe-  
nijn daer in te doen. O welck den Marcgraue verstaen-  
de / heeft geleyt / datmen daer af soude de wete doen aen  
den Prince van Parma / om in desen niet te bestaen dan  
met sijn authoziteyt / ende oock om van hem verskert-  
heyt te hebben vande geloften van vergeldinge. Ende  
alsoo de selue Marcgraue binnen Ceclo was / soo heeft  
hy daer af gheschreuen aen den Prince van Parma die  
binnen Doornick was: Hy heeft terstont antwoorde  
ghehadt vanden seluen Prince van Parma / die hem liet  
weten / hoe dat hy den aenslach goet vont / ende macht  
gaf om de gheloften te doen / maer datmen de boozsepde  
Capiteyn niet en behoorde by te laten gaen / om geen  
quaet bemoeden op hem te hebben / maer datmen hem  
soude weder seyn den met eenige verwe: Soo de Marc-  
graue



grauē dese hziēuen ontfangen hadde/ wort by hem ghes-  
loten dat hy hem soude laren gaen voor een maēt solts/  
ende hem wert een trompette ghegeuen om hem te ghe-  
leyden/ de welcke t'ghelt soude mede brenghen/ ghelijck  
hy dede. Als nu dese Capiteyn weder gecomen was/ hy  
heeft alle d'ander Capiteynen mettē Gouverneur van  
de sterckte by een vergadert/ ende henlieden verclaert  
de ghelofte die hy ghedaen hadde: Niet langhe daer na  
is hy ghecomen by den seer Doozluchtigen Prince/ende  
heeft hem mondelinghe verhaelt al t'gene dat hier ver-  
claert is/ welcke Capiteyn hem naderhant heeft altyts  
seer ghetrouwelijck ende bromelijck ghedraghen/ totter  
tijt dat hy inde voorszeden maent op de schans van Lil-  
lo belegghert sijnde/ met ander Capiteynen ende solda-  
ten eenen wtval dede/ende nedergelept hebbende d'Ita-  
lianen ende Spaignaerts die de wacht hadden/ weder  
ghebrocht wort door sijn been gheschoten sijnde/ van  
welcke quetsure hy naederhant binnen Antwerpen ge-  
storuen is. Dit sijn de principaelste aenslaghen vande  
vpanden/ die tot merckelicke kennisse sijn ghecomen.

De voorszede vpanden meynende dat sy niet anders  
ter werelt te doen en hadden dan met desen Prince al-  
leen/ al oft inden hemel gheenen Godt en ware/ die an-  
der personen souden moghen verwecken/ ghelijck hy  
desen goeden ende bromen Prince verwert hadde/ en  
hebben niet opghehouden van menigherhande manie-  
ren te bedencken/ soo dat sy epndelick hem hebben doen  
vermoorden op den 10. dach van Hopmaent/ van desen  
iare vijftienhondert vierentachtentich: welck seyt al-  
dus ghebeurt is.

Ontrent t'beginnel vanden Mep./ is een man/ out  
sijnde ontrēt sessentwintich oft seuenentwintich iaren/  
middelbaer cort van persoone/ ende slecht van gedaen-  
te/ ghecomen aen den persoone vanden Prince/ ende  
heeft



heeft hem eenen brief ghegeuen. Den Prince braechde hem van wien dat den brief quam. Hy antwoorde dat sijn eyghen brief was/ende dat hy hem wilde te kennen gheuen eenighen grooten dienst booz het lant/ ghelijck oock het inhouden vanden seluen brief onderteekent was Francois Guion. Des anderen daechs is hy ghecomen aen eenen Secretaris/ den welcken hy heeft ghebeden om hem antwoorde te doen hebben/ ende dat hy treffelijke saken hadde om te kennen te gheuen. Dese Secretaris sijnde twee oft dyp daghen aldus aen ghesproken/ seyde hem dat hy mocht gaen aen een vande dienaers vanden huyse/ door de welcke hy antwoorde mocht hebben op sijn brieuen. Dese man is ghecomen aen een vande dienaers/ segghende dat hy aen hem was ghesonden/ om hem saken te kennen te geuen/ die grootelijck souden dienen tot voozderinge vanden lande ende de Religie. Seker daghen daer naer/ hebbende mijn Heere den Prince het inhalt vanden brief verclaert/ soo heeft hy beuolen datmen hem soude hoozen spreken/ ende hy dese middel heeft hy te kennen ghegeuen/ sulcr als nu volcht. Dat hy was genoemt Francois Guion/ ende ghebozen tot Bezanson/ ende dat hy altijs hadde gheweest een goethertich dienaer vanden Prince/ om dat hy was Burckgraue van Bezanson/ ende de machtiichste Heere van Hooch-Bourgoigne/ dat hy oock altijs goede begeerte hadde ghehadt om hem dienst te doen/ maer sonderlinge sedert de doot van sijnen vader/ die tot Lions ghebozen was/ maer ghehouwet tot Bezanson/ waer dat nae den aenslach vanden Heere van Beauieu/ Edelman vander Religie van het Hertochdom van Bourgoigne/ die ghedaen wert op de stadt van Bezanson/ sijn voozseyde vader door quaet vermoeden gheuangen hadde geweest/ midts dat hy vande Religie was/ ende ter doot ghebrocht wort/ soo dat

B hy se



hy sedert den seluen tijt/ soo wel om de schande die hy hadde wt oorsake vande selue doot/ als oock principa-  
lijck/ om dat sijn conscientie hem dwonck te comen ter  
plaetse daer men de Religie oeffende/ groote begeerte  
hadde hem van daer te vertrecken/ om den Prince te die-  
nen/ ende dat hy tot deser meyninghe ouer twee iaren  
van daer vertrocken was met een goet peert ende wa-  
penen/ om hier te lande in dienst te comen. Maer soo hy  
reysde door het lant van Luxemborch/ soo woude hy be-  
soecken een van sijn Cosijns/ genoemt du Pré/ de wel-  
ke Secretaris was van Graue Peeter van Mansfelt.  
Desen Cosijn heeft hem geraden dat hy wat tijts sou-  
de by hem bliuen/ want hy selue hem vast berade/ om  
oock van daer te vertrecken/ midts dat hy daer woon-  
de teghen sijn conscientie/ dwelck hem daer dede by hem  
bliuen/ ende hoe wel dat hy dickwils van wille hadde  
gheweest van te vertrecken/ soo hadde hem nochtans  
altijts eenich letsel daer ghehouden: Niettemin Daels-  
schen nu laetsleden hadde hem Godt met ghewelt ghe-  
dwongen van daer te vertrecken/ ende dat wt oorsake  
datter was een Priester van Brussel in t' hof vande selue  
Graue van Mansfelt/ die seer hert ende straf was tegen  
de ghene die suspect waren vande Religie/ de welcke in  
henlieder camers quam om te besien wat sy deden/ soo  
dat hy ende sijn Cosijn dickwils lust hadden ghehad/  
om hem eenich quaet spel te spelen/ die desen Daelschen  
laetsleden henlieden dreychde aen te brengen/ soo verre  
als sy niet en quamen te biechten/ ende tot henlieder  
Sacrament/ dwelcke d'oorsake was dat de selue die  
hem Guion noemde/ reysde tot Triere om t' hoochtijt  
daer te bliuen/ maer van daer weder ghekeert sijnde/  
soo heeft hem den voorszeyden Priester gebraecht/ waer  
hy hoochtijt ghehouden hadde/ waer op hy antwoorde  
binnen Triere/ inde kercke vande Jesuiten/ ende dat de  
princi-



principaelste van henlieden hem het Sacrament ghe-  
gheuen hadde/ maer soo tot alle ongheluck de voorsz.  
de Jesuit tot Luxemborch ghecomen was/ den Priester  
heeft hem ghebraecht/ oft hy de selue die hem Guion  
noemt/ het Sacrament weghereyct hadde/ de welcke  
antwoorde/ Neen/ waeron dat de selue Priester/ we-  
tende dat den voorsz. Guion op een huys was/ geheeten  
Fontaine met den Graue van Mansfelt gheleghen by  
Luxemborch/ welck huys den selue Graue toebehoort  
(die daer dickwils gaet/ om dat hy daer doet bouwen)  
is daer by hem ghecomen/ ende heeft hem willen van-  
ghen/ maer hy verweerde hem/ ende gaf den Priester  
eenen steke met een dagghe oft rapiere/ soo dat hy alsoo  
ontquam/ ende binnen Triere gecomen sijnde/ hy ont-  
boot synen Cosijn dat hy hem wilde sijn peert seyn den/  
en wat ghelts/ niettemin siende dat hy te lange toefde/  
oock vreesende dat hy soude moghen ghemelt worden/  
van dat hy de reyse aenghenomen hadde nae den Prin-  
ce/ om hem dienst te doen/ ende dat hy goet middel had-  
de om dat te doen/ ende sulcx segghende/ soo heeft hy wt  
sijn mauwe ghetrocken een packen vol vliegghende se-  
ghels vanden voorszden Graue van Mansfelt seggen-  
de / dat hy den seluen seghel dickwils in sijn ghewelt  
hadde gehad/ als wesende den principalen clerck van  
den voorszden du Pré/ ende dat hy door de selfde den  
soetelaers ende ander die ghedient hadden veel passe-  
poorten gemaect hadde/ datmen oock door middel van  
dese signetten ende seghels / wat goets soude moghen  
volbrengen. Dit verhael aen den Prince overgebracht  
sijnde / hy beual datmen hem soude vraghen / waer toe  
dat sulcx soude moghen dienen. Hy antwoorde/ datmen  
soude moghen eenighen aenschach maken op een Stadt/  
oft ten minsten in dien de steden van Luxemborch te  
verre gheleghen waren/ datse de bespieders ende ander



die door t'landt trocken dienen souden. Het welcke den Prince wedergheseyt sijnde/ heeft voor antwoorde ghegheuen / datter gheen middel en was om door sulcke middelen eenighen aenslach te maken / maer datmen met sommighe soude moghen behelpen/ om de boden die gaende ende comende waren van Brussel tot Camerijck / ende dat hy eenighe daer laten soude om tot Brussel te seyn den / ende aengaende dereste/ raet ghenomen hebbende met den Heere van Pruneaur / als doen Ambassaet voor mijn Heere van Anjou/ saligher ghedachten / soo vondt hy goet / soo die ghelegghentheydt voor handen was / dat den Heere Caron/ Heere van Schoonewal/ naer Brancckrijck reysende / hem soude met hem nemen / om te weten oft de Heere van Biron / die men seyde dat op dien tijdt soude Gouverneur sijn van Camerijck/ hem soude moghen behelpen met dese seghels voor passepoorts / ende soo den seluen Heere van Schoonewal oorlof nam/ hem wort vanden Prince belast dat hy hem soude mede nemen/ welcken achtervolghende hy ghereyft is in Brancckrijck: ende daer sijnde/ soo hy heeft brieuen herwaerts ouer gheschreuen / hy de welcke hy liet weten datmen hem gelooft hadde seer haest te doen sien den Heere van Beauieu / de welcke sijnen vader wel kennen soude/ als ghestoruen sijnde in synen dienst / ende dat hy hope hadde door desen middel eenighe eerlijcke conditien te binden.

Onlancr daer naer heeft hy brieuen ghebrocht/ soo wel aen den voorsayden Prince/ als aen de Staten/ de welcke mentie maecten vande doot van sijn Alteze. Als den Prince sijn brieuen ghelesen hadde / hy heeft den seluen Guion in sijn camer doen comen/ soo hy noch op sijn bedde lach/ om hem particulariteyt te braghden vande doot van sijn Alteze : ende heeft de selfde Guion



Guion naerderhant bekennt / gheuanghen sijnde / hoe dat hy als doen soude den Prince op sijn bedde vermoort hebben / waert dat hy sijn dagghe by hem ghehadt hadde. Daer naer heeft den selfsten Guion / gaende inde Predicatie ende Auont-ghebeden / altijs inde handt draghende een Psalm boeckken / oft eenich boeck vande Religie / ende leenende vanden Doortier den Bybel / hem seluen inde kennisse ghebrocht van sommighe vanden hupse / onder het decksel vande Religie. Ende alsoo hem gheseyt wordt / dat hy al daer niet meer te doen en hadde / ende dat hy hem soude vertrecken / soo eyfchte hy wat ghelts / tooghende dat hy noch schoens / noch coussens en hadde die dochten / waer door dat den Prince / volghende het aduijs dat hem ghegheuen was / als datmen hem soude wederomme wech seyn den / beual dat een vande Secretarisen soude beneerstighen / datmen hem eenich ghelt gaue / om wederomme te seyn den. Dwelcke den seluen Secretaris beschickte / ende dede hem leueren sijn beuel ende last / ende heeft op dien Sondach den achtsten dach vander maent sijn ghelt ontfanghen. Des anderen dachs alsoo hy sedert heeft bekennt / soo cochte hy van twee soldaten vander wacht twee sinckroeren / iae hy creech woorden teghen een vande selfste soldaten / om dat hy hem ghebetter oft teerlinck loot wepgherde te maken.

Op den thienden dach wachte hy dat den Prince saligher ghedachten af quam om te gaen eten / ende commende by den seluen Prince / heeft hem een passpoort gheeyfcht / dwelcke hy was eyfchende (ghelijck mijn Vrouwe de Princesse seer wel merckte) met een beuende stemme ende verbaest sijnde / in voeghen dat de selfste Vrouwe mynen Heere den Prince vraechde / wie dat hy was / ende dat hy een seer



quaet ghelaet hadde/waer op dat den Prince antwoor-  
de/ dat hy sijn afschept begheerde/ dwelck hem soude  
ghemaect worden. Teghen het eynde vander maeltijt  
sachmen hem wandelen ontrent de stallinghen/die ach-  
ter het huys staen/ streckende naer de wallen vander  
stadt/ en staende aen de doze vande sale daer den Prin-  
ce gh'eten hadde / soo hy soude wtcomen/ is hy by den  
Prince ghecomen / ende de maniere makende van sijn  
passepoort te eysschen/heeft hem niet een sinckroer door-  
schoten. Den Prince ghevoelende dat hy ghetrefte was/  
en seyde anders niet dan dese woorden/Heere Godt weest  
mijn siele ghenadich, ick ben seer ghequetst, Heere Godt  
weest mijn siele, ende dit arm volck ghenadich: Dese woo-  
den ghesproken hebbende / soo begonst hy te supselen/  
maer sijn schiltknecht heeft hem vast ghehouden/ ende  
wert ten laetsten op de trappen neder gheset/ waer dat  
hy niet meer en sprack / dan soo mijn Vrouwe de Gra-  
winne van Swertzenborch sijn suster / hem in Hooch-  
duyts vzaechde/ Oft hy sijn siele niet en stelde inde han-  
den Christi Jesu/ soo antwoorde hy inde selue tale/Jae/  
ende en heeft noyt meer ghesproken. Cortz daer naer  
wert hy op een bedde ghedraghen inde Sale daer hy  
gh'eten hadde/ waer dat hy niet langhe daer nae synen  
salighen gheest gaf. Sulcr heeft het eynde gheweest  
vanden wijsten/ghestadichsten/grootmoedichsten/ghe-  
duldichsten / manierlijcsten / oprechsten / waerachtich-  
sten ende rechtveerdichsten Prince van synen tijt. Den  
Moorder die sijn saken wel meynde beschiet te hebben/  
socht te ontcomen lancy de achter-plaetse/ ende heeft in  
t'wech loopen sijn ander sinckoerr laten vallen/ en was  
alreede de stallinghen ghepasseert/iae verre inde strate  
by de vesten/ soo hy ouer eenich stroo passeerde neder  
ghevalen is/ ende nochtans weder op ghestaen / ende  
op de wallen gheclommen/ meynde alsoo inde stadt-  
vesten



besten te springhen die vol waters sijn / Maer hy wert  
vast ghehouden van twee van des Princen dienaers/  
by de welcke noch ander gecomen sijn. Hy was int eer-  
ste seer verbaest ende verschriect / Maer inde stallinghen  
ghebrocht sijnde / ende siende datmen hem bewaren  
wilde / iae datmen niet en sprack van hem doot te slaen/  
hy maecte d'onuerbaesde / ende soo een vande dienaers  
hem seyde / ghy sijt eenen snooden schelm / Hy seyde ick  
en ben gheenen schelm / want ick hebbe ghedaen t'ghe-  
ne dat my den Coninck belast heeft: Wat Coninck sey-  
de de dienaar? Den Coninck van Spaignien mynen  
meester / antwoorde hy. Maer soo hy doen in t'hups  
ghebrocht wort / incomende door de doze daer hy wt  
ghecomen was / ende aenliende de selfste poorte / oft  
doze / Och poorte / poorte seyde hy / ghy hebt my bedro-  
ghen / ick sien wel dat ick een doot man ben / ende wert  
op de staende voet ghebrocht in t'hups vande Conci-  
ge. Als nu die vander Wet daer ghecomen waren / men  
heeft terstont onderbraccht ende gheexamineert / maer  
hy eyschte papier ende inckt / ghelouende nae dien hy  
een gheuanghen man was / dat hy de gheheele waer-  
heyt soude verclaren / dwelcke hy nochtans niet en de-  
de / want hy menghte veel loghenen onder sommighe  
saken die waerachtich waren.

Hy gheruychde dat hy ghenoeit was Baltazar  
Gheeraerts van Willefang in Bourgoigne / ende dat  
hy liet weten / hoe dat hy ouer ses iaren geleden / iae ten  
tyde dat de Pacificatie van Ghent ghebroken was /  
den wille hadde ghehad vanden Prince te dooden en-  
de vermoorden / ende bewijsde dat hy de selue meynin-  
ghe hadde doen hy binnen Dole was / ten hupsse van  
Jan Villauz / ontrent ses iaren gheleden / midts dat hy  
een bloote dagghje in sijn hant hebbende / de selfde wt  
alle sijn macht in een doze stack / segghende: Dat hy  
wel



wel woude dat den ſteke gheweest waer in t' herte van:  
den Prince van Orangien/ waer af dat hy berispt wort  
van een die ghenoeit was Jan Willems Donthier  
van Virret in Bourgoignen/ de welcke hem ſepde/ dat  
hem niet toe en behoorde de Princen te vermoorden.  
Doozts ſoo hy binnen dzy iaren herwaerts verſtaen  
hadde/ hoe dat den Coninck van Spaignien bonniſſe  
ghegheuen hadde reghen den ſeluen Prince van hem  
te dooden/ waer dat hy ware/ dat hy wt Bourgoignen  
vertrocken was/ ende herwaerts ouer ghecomen met  
meyninghe om t' ſelfde bonniſſe metter daet te volbrin-  
ghen/ dwelcke was inde maent van Sprockelle van  
den iare 1582. Maer ſoo hy binnen de ſtadt van Luxemb-  
borch inde maent van Maerte ghecomen was/ ſo hooz-  
de hy daer ſegghe dat een ſeker Biſcoper den ſelfden  
Prince vermoort hadde/ waeromme dat hy hem inden  
dienſt ſtelde van een die ghenoeit was Jan du Pré/  
Secretaris vanden Graue van Hanſfelt/ Gouverneur  
van Luxemborch: maer naemaels verſtaende dat den  
voorzeyden Prince niet en hadde vermoort gheweest/  
hy nam vooz hem/ watter hem oock af comen mocht/  
ſijn voorzeyt voornemen te volbringhen/ hopende dat  
hy den bequamen tijt ſoude waernemen om dies te  
doen/ als den Graue van Hanſfelt ſoude inden legheer  
weſen / ontrent eenighe plaetſe daer den Prince waer/  
ende dat hy heymelijck ſoude van hem gaen/ hem beyn-  
ſende dat hy van des Princen Religie waer / ende dat  
hy ſommighe vliegende ſeghels ſoude preſenteren ghe-  
druct in root was metten ſignet vanden ſeluen Graue/  
ende hadde hope dat hy eenen toeganck ſoude vinden  
in t' Hof vanden ſeluen Prince / om alſt tijt ende ſtont  
ſoude gheuen/ ſijn voornemen te werck te ſtellen ende te  
volbringhen aen den perſoone vanden Prince/ met het  
minſte perijckel dat hem moghelijck waer. Volghende  
dan ſijn



dan sijn verouderet boornemen (dat sijn sijn eygen woord-  
den) soo heeft hy ouer iaer in Wedemaent oorlof ver-  
socht aen den voorsz. du Pré/ die binnen Diest was/ om  
dat hy gheen schijnsel en sach/ van bequamelijcker te  
moghen geraken by den voorsz. Prince: om dat de voorsz.  
sejde van Hansfelt wederom keerde na Luxemborch:  
nietemin soo de voorsz. du Pré sijn meester ende Co-  
sijn ernstelijck op hem versocht/ dat hy hem soude vol-  
ghen/ hopende (alsoo de selue du Pré hem wijs maecte)  
dat den Graue cortz soude wedercomen inden leggher/  
iae binnen een maent/ende siende dat hy de sake wistel-  
de/ hy dacht eenighen twist tegen sijn voorsz. de meester  
te nemen/ om van hem te moghen scheiden/ midts dat  
hy altijs tot sijn boornemen ghedreuen wort/maer hy  
en conde gheen oorlof crygen. Dat hy oock naderhand  
ghesocht hadde wt Luxemborch te vertrecken / om sy-  
nen aenslach te comen veruolghen / maer dat als doen  
sijn voorsz. de meester beuont/ dat hem wt sijn kiste vier  
hondert vijftich croonen ghestolen waren/ ende dat hy  
(op datmen op hem gheen quaet vermoeden en soude  
hebben van dese diefte) daerom noch was ghebleuen  
inden voorsz. den dienst/ nietemin soo t'selue ghelt we-  
der gheuonden was/ hy socht alle middelen om by den  
voorsz. den Prince te geraken/ soo op dien rijt de Wal-  
sche vendelen die binnen Luxemborch lagen/ in Neder-  
lant ontboden waren: Maer hy wert weder belet door  
de siecte vanden voorsz. du Pré/ de welcke geduerde acht  
daghen voorsz. kerstmisse/ende was veertien daghen daer  
nae om weder tot hem seluen te comen. Ten laetsten  
heeft hy in Maerte laetstleden van sijn voorsz. de mee-  
ster oorlof genomen/ende eer hy herwaerts ouer quam/  
is hy gherepst tot Triere/ waer dat hy in bichte ver-  
claerde aen eenen Jesuit / die hem hielt in t' Collegie  
vande Jesuiten tot Triere/ alle sijn opstel ende boorne-  
men,



men/ ende toonde hem de voorszeyde segghels/ hem bid-  
dende dat hy sulcx soude secreet houden tot Paesschen/  
ende als dan t'selue te kennen gheuen den voorszeyden  
Graue van Mansfelt. Dat hy oock/ volgende den raet  
vanden seluen Jesuit/ sijn voornemen heeft te kennen  
ghegheuen den Prince van Parma/ ende dat door ee-  
nen brief die hy ordineerde binnen Doornick/ de welcke  
hy selue heeft ghepresenteert aen den seluen Prince/  
maer dat hy op de selue gheen antwoorde en dorste  
verwachten/ vreesende dat hy seer qualijck nemen sou-  
de het ouerdragen vande voorszeyde vliegghende segghels/  
ende is alsoo ghecomen binnen dese Stadt van Delft/  
waer dat hy heeft gheleuert de ghedruete segghels van-  
de voorszeyde Graue/ dwelcke hy ghedaen heeft/ op ho-  
pe van te vinden bequamen tijt om synen aenclach te  
voluoeren. Soo veel isser af/ datter gheraden wort dat  
hy soude met den Heere Caron trecken nae Branc-  
rijck/ ende vande selue segghels geuen den Maerschalc  
van Biron/ ende ander die de partye hielden van wy-  
len mijn Heere den Hertoghe van Anjou: maer soo den  
seluen Hertoghe ouerleden was/ soo wert hy tot sijn ep-  
ghen versoeck weder ghelonden herwaerts ouer/ brie-  
uen brenghende vanden voorszeyden Heere Caron/ soo  
wel voor den Prince/ als voor de Staten/ hy de welcke  
sy de wete cregghen vande doot van sijnder Alteze/ ende  
heeft van dien tijt voort alle middelen bedacht/ om sy-  
nen aenclach te volbrengen/ maer so hy geen bequamer  
en vont/ dan van hem te doorschieten/ oft als hy soude  
nae de Predicatie gaen/ oft als hy beneden soude comen  
eten/ oft als hy nae den eten soude wt comen/ soo hadde  
hy des daechs te voren twee sinck-roeren ghecocht/ en-  
de heeft het een gheladen met dyp clooten/ ende d'ander  
met twee/ waer af dat hy t'ghene dat met dyp geladen  
was/ op dien dach gheloffet heeft op de borst vanden  
voorz-



voorszeyden Prince / ende midts de weire die de Helle-  
 bardiers ghedaen hadden / en hadde hy het tweede niet  
 moghen afschieten / dwelck hem seer verdrietelijck ende  
 leet was / verskerende dat hy al dien hy teghenwoor-  
 dichlijck waer dupsent mylen van hier / dat hy soude  
 herwaerts ouer wederkeeren / om te veruolgen de doot  
 vanden seluen Prince. Dese saken worden ghetuycht  
 ende gheschreuen by den seluen Geeraert / inde Camer  
 vanden Concierge / ende ouer hem worden gheuonden  
 twee blasen die wat op gheblasen waren met een pijs-  
 ken / om de selue voorts op te blasen / hopende door mid-  
 del van dien te gheraken ouer de vesten vander Stadt.  
 Daer en bouen hadde hy veel meer propoosten / strec-  
 kende tot dien eynde / dat al hadde den seluen Prince  
 vijftich dupsent crijchlieden ontrent hem ghehad / soo  
 verre als hy hadde moghen ontrent hem comen / dat hy  
 t'seyt soude ghedaen hebben / iae noch doen soude / want  
 hem seer leet was dat hy niet doot en was (gelijck men  
 hem wijs maecte) ende gheuraecht hebbende oft hy  
 ghequerst was / soo hy verstont iae / hy voechde daer by /  
 dat hy seer blyde was / ende dat hy de doot niet en soude  
 moghen ontgaen. Daer nae wesende inde gheuancke-  
 nisse / heeft hy op verscheyden reysen bekent / ende tot  
 inde doot daer hy ghebleuen / t'gene dat hier na volcht.

Ten eersten heeft hy / bouter t'ghene dat hier vozen  
 gheschreuen is / onghelynnicht verclaert / dat hy t'von-  
 nisse van hy eenich middel den Prince voorszeyt te mo-  
 ghen dooden / niet en hadde ghesien dan binnen vijf  
 maenden herwaerts / maer wel dat hy hadde hoozen  
 segghen / hoe dat in Nederlant van te vozen openbaer-  
 lijck was wtgheroepen. Hy seyde dat hy inde maent  
 van Mepe laetst leden hier niet meer dan acht daghen  
 en was / ende dat hy binnen den seluen tijt den voorszeyden  
 aenslach soude volvoert hebben / hadde hy bes-



quamen tijt ghehat/ ende eenighe hope oft middel ghe-  
lien van te moghen ontcomen. Dat hy na de doot van  
den Hertoghe van Anjou synen dienst geboden hadde  
om de bziuen te draghen vanden voorszeden Heere  
van Caron/ten eynde dat hy soude moghen herwaerts  
ouer comen / om sijn seyt te volcomen: Dat hy oock  
noyt sijn seyt en hadde te kennien ghegeuen den seluen  
Heere Caron/want hy sijn oprecht ende goet herce veel  
te wel kende/ ende dat hy in dit lant niet geen mensche  
ter werelt van synen aenflach ghesproken en hadde.  
Dat hy des daechs te voren den wille hadde ghehad  
om den seluen aenflach te volbrengchen / recht op den  
noen / maer siende dattet niet mogheliick en was te  
ontcomen/ soo en hadde hy sulcx niet deruen bestaen/  
maer dat hy op desen dach / niet willende langher toe-  
uen/ hadde vast vooz hem ghenomen dat te doen / wat  
perijckel datter oock mocht wesen / iae al hadde den  
Prince omcinghelt geweest van vijftich duysent man-  
nen/ dat hijt soude ghedaen hebben/ ende dat hem leet  
is/ dat hy mijn Heere de Prince niet en heeft ter doot  
ghebrocht/ maer dat hem niet leet en was/ t'selfste be-  
staen te hebben/ iae al waer hy ouer duysent mylen/ dat  
hy niet en soude vertoenen van te passeren gheberchten/  
riuieren/ ende alle swaricheden van wegghen om sulcx  
te volbrengchen/ maer aengaende de Jesuit van Triere/  
hy seyde als voren. Daer en bouen/ sprekende tot d'een  
ende d'ander/soo seyde hy: Dat hy in Franckrijck sijnde/  
noch dach/ noch nacht gheslappen en conde / soo seer  
wert hy ghequeelt vande begheerte van synen aenflach  
te volboeren/ iae op dat hy soude mogen weder gheson-  
den worden/ soo heeft hy twist ghesocht/ ende gheuoch-  
ten teghen de dienaers/ ende in dien hy op dese reyse  
gheen middel en hadde ghehad om te volbringhen/ hy  
soude weder ghekeert hebben in Franckrijck/ende hem  
gheuochte



gheuoecht hebben by eenich ghemeente vande Religie/  
waer dat hy hem in sulcker manieren soude ghedragen  
hebben/ dat hy eenen toeganck soude ghehadt hebben  
by die vander Consistorie/ ende dat hy soo veel soude  
ghedaen hebben/ dat hy soude vercreghen hebben brie-  
uen van reconmandatien/ om weder te comen her-  
waerts ouer/ ende by desen middel eenen toeganck te  
hebben/ om synen aenclach te lichtelijck moghen vol-  
bringhen. Soo hy ter banck hadde gheweest/ ende  
oock eer hy op de banck quam/ soo bekende hy/ dat hy  
sijn seyt te kennen ghegheuen hadde binnen Doornick/  
den Doctoor inder Godtheit/ broeder Gery de Minne-  
broeder/ ende dat inde maent van Meert laetstleden/ by  
d'welcke nae dat hy gheppnicht was/ hy oock gheble-  
uen is: Soo hy nu wederom gheppnicht wert/ hy sey-  
de/ soo hy een aerm gheselle was/ ende soeckende eenich  
goet te vercreghen/ hy gaf den Prince van Parma de  
sakere kennen/ de welcke den Raetshere van Almon-  
ville heeft gheordonneert/ om met hem op dit seyt bree-  
der te sprecken/ dese nae dat hy hem hadde verhaelt de  
perijckelen die daer in ghelegen waren/ heeft hem ghe-  
seyt/ dat hy den Coninck van Spaignien soude eenen  
grooten dienst doen/ maer in dien hy achterhaelt waer/  
dat hy den Prince van Parma niet en soude willen be-  
dragen/ ende op de swaericheden vanden toeganck in  
t'hof vanden Printe/ die de seluse van Almonville hem  
voorzhielt/ soude hy gheantwoort hebben/ dat hy hem  
seluen soude noemen. Fransys Guion/ de sone van een-  
nen Peter Guion/ borger van Besanzon/ die hier voor-  
tijts ter doodt ghebrocht wert om de Religie/ met con-  
fiscatie van sijn goeden/ ende dat hy als een aerm ghesel-  
le/ ende luttel goets hebbende/ oock seer goet hert dra-  
ghende tot de ghereformeerde Religie/ soude ouertrec-  
ken in Hollandt/ ende gaen in t'hof vanden voorszeyden



Prince/ waer dat hy de voorszeyde segghels soude presenteren/ om hem seluen aenghenaem te maken. Welcke de selue van Alphonleuille seer goet vont/ die hem vermaende dat hy sijn voornemen soude volbrēghen/ hem biddende (als voorszeyt is) dat hy den Prince van Parma niet en soude bedraghen/ ende dat den seluen Prince niet en soude nut wesen/ dat hy hem soude mellen. Des anderen daechs heeft hy sonder pynighen bekent/ bouen des voorszeyt is/ dat hy soaechs te voren was comen sien/ oft sijn Excellentie beneden was ghecomen om te eten/ ende siende dat hy ouer maeltijt was/ soo heeft hy in sijn herberghe ghegaen om sijn twee roers te laden/ die hy hadde hanghende aen synen rieme/ op de sincker syde/ latende synen mantel hanghen op de rechte syde/ om datmen soude min achterdenckens hebben: Noch seyde hy voorts/ hoe de voorsz. van Alphonleuille/ nae dat hy met hem vande sake ghesproken hadde/ hem ghe-loofde de sake te verclaren aen den Prince van Parma/ welcke ghedaen hebbende/ hy hem verclaerde dat den seluen Prince van Parma de sake goet vont/ ende in dien hy dat volvoerde/ dat hy ghenieten soude den loon die in t'voorszeyde vonnisse begrepen was. Daer en bouen/ dat de selue van Alphonleuille hem noch voorszeyt eenighe swaricheden/ ende siende dat hy soo seer daer toe ghemoet was/ heeft hem gheseyt: Gaet henen mijn sone/ ist dat ghy dit seyt volbrēght/ den Coninck sal v houden al t'ghene dat hy gheloeft heeft/ ende ghy sult eenen ewighen naem hebben/ waer op de selue Gheeraert seyde/ dat hy hoopte hem seluen soo wel te verpnsen vander Religie te wesen/ dat hy soude moghen comen inden dienst van eenich Secretaris/ ende hy sulcken middel bequamen tijt te hebben/ van te presenteren eenighe brieuen om te onderteckenen/ ende dat hy als dan in het teeckenen soude den Prince met een dagghedoor-



door-ſteken. Naē dat hy gheppnicht was/ ſoo ſeyde hy  
noch/ dat hem niet leet en was/ dat hy de ſake op den  
perſoone van ſijn Excellentie beſtaē hadde/ ende in dien  
dat noch te doen ware/ dat hy niet laten en ſoude dat te  
doen/ al ſoudet hem coſten dupſent huen. Op den der-  
tienſten dach bekende hy/ bouen dat voorgeſeyt is/ dat de  
voorgeſeyde van Alſonleuille hem gheloeft hadde/ dat den  
Prince van Parma hem ſoude behulpich ſijn / dat den  
Coninck van Spaignien hem ſoude houden t'ghene  
datter gheloeft was by t'vonnisse/ ende dat hy t'ſelue  
ſeyt beſtaen hadde om rijk te weſen: Dat oock de ſelue  
van Alſonleuille den ſeluen Prince van Parma getoont  
hadde de voorgeſeyde ſeghels/ die hy hem weder gaf/ ſeg-  
ghende dat den Prince van Parma te vreden was/ dat  
hy die ſoude ghebruycken/ maer dat gheſloten wert/  
dat voortaan de ſeghels vanden Graue van Hanſ-  
felt/ niet meer en ſouden rupt-wijs gheſneden worden/  
ende dat hy ſynen ſeghel ſoude veranderen/ op dat ſijn  
bliegghende ſeghels ſouden onnut weſen/ ende heeft de  
ſelue van Alſonleuille hem gheraden / dat hy comende  
binnen Antwerpen / ſoo verre hy gelept ware voor de  
Heere van S. Aldegonde/ de ſelue ſeghels hem ſoude  
tooghen / dat hy oock comende in eenighe ſtadt ſijn ſe-  
ghels alcijs erghens berchde/ die hy naderhant ginck  
halen. Dat den voorgeſeyden broeder Gery/ ſijn voorne-  
men ghehoort hebbende / hem heeft gheſeyt: Aenghe-  
ſien dat hy voor hem ghenomen hadde t'voorgeſeyde ſeyt  
te volboeren/ dat hijt doen ſoude/ ende heeft hem ſynen  
ſeghen ghegeuen/ ende gheloeft dat hy Godt voor hem  
ſoude bidden/ dat oock den Jeſuit van Triere hem dieſ-  
ghelijc gheloeft hadde/ ſegghende: dat hy ſoude ghe-  
ſtelt worden in t'ghetal vande Martelaers/ in dien hy  
om deſen aenſlach ſtoze: Dat hy den naem vanden ſel-  
uen Jeſuit niet en wiſt/ dan dat hy regent was vande  
Colle:



Collegie / ros van verwe / ende dat den seluen Jesuit  
van dit seyt ghesproken hadde met dyt ander persoo-  
nen van sijn collegie. Volghende de voorszende belydin-  
ghen / by de welcke hy heeft ghebleuen tot inde doot/  
wert hy gheordeelt ende verwesen / nae inhouden van-  
den bonnisse hier onder gheschreuen. Soodanich heeft  
het eynde gheweest vanden seer Doorluchtigen Prince  
van Orangien / op dwelcke wy nu ter tijt geen verhael  
en sullen maken / midts dat wy voor ons ghenomen  
hebben / niet anders dan waerachtich voor ooghen te  
legghen de omgheleghentheden van t'seyt dat in synen  
persoone ghebuert is / ander sullen verscheydelyck daer  
af spreken / een peggelijck nae sijn ghesintheit / eenighe  
oock met wetenschap / ende ander met onwetenschap.  
Soo veel als ons belanght / ten is niet van noode dat  
wy besich blpuen / dan met de verhalen die ghesondeert  
sijn op het woort Godts / met dwelcke wy moeten ons  
profijt doen voor ons leuen. Soo seyt dan t'woort  
Godts int elfste Capittel vanden brief totten Hebreen.

Maer wat sal ick noch segghen? den tijt sal my ghebreken,  
ist dat ick wil verhalen van Gedeon, van Barach, van Sampson,  
van Iephthe, van Daudid, van Samuel ende vande Propheten,  
die door t'ghelooue den Coninckrijcken verwonnen hebben,  
gherechtigheyt ghewrocht hebben, de gheloften vercreghen  
hebben, ende de monden vande Leeuwen ghestopt hebben,  
t'ghewelt vanden viere gheblust hebben, t'scherp vanden  
sweerde ontgaen hebben, van siecken ghenesen sijn, vroom  
gheworden sijn inden strijt, ende de leghers vande vremdelin-  
ghen verdreuen hebben: De vrouwen hebben henlieder doo-  
den ontfanghen door de verrysenisse, maer sommighe hebben  
belet gheweest, midts datse gheen werck en maecten van ver-  
lost te wesen, om dat sy een beter verrysenisse souden vercry-  
ghen. Ander hebben versocht ende gheproeft gheweest door  
spottinghen ende slaghen, daer en bouen oock met banden  
ende

i  
t  
e  
t  
s  
v  
ee  
re  
v  
in  
m  
n  
da



ende vanghenissen. Sy hebben ghesteent gheweest, ghesaecht gheweest, ghequelt gheweest, metten sweerde ter doot ghebrocht gheweest, herwaerts ende derwaerts ghereyft, ghecleet met vellen van schapen ende gheyten, aermoede lydende, benaut ende verdruet, de welcke dewerelt niet weerdich en was, dolende in woestynen, in gheberchten, in duwieren ende hollen vander aerde.

**Elapas seyt oock int 57. Capittel:** De rechtveerdige is vergaen, ende daer en is niemant die in sijn herte daer op peyft, ende de goedertieren mannen hebben eynde ghenomen, om datter niemant en is die daer toe verstaet: want die rechtveerdighe sijn wech ghenomen wt het quact, om dat sy souden comen in vrede, ende rusten in haerlieder slaepcamer, ende voor hem wandelen.

**Op sulcke ende dierghelijcke passagien moeten wy ons verhael maken/ dat niet alleen nu ter tijt/ maer dat tot allen tyden sulcx heeft gheweest t'leuen vande heylighe mannen/ die hen ghestelt hebben teghen de tyrannen ende veruolghers vander kercken / ende henlieder doot heeft meestendeel ghecroont gheweest met Martelaerschap: welcke doot der kercken heeft profyteliker gheweest/ dan daer te voren henlieder leuen geweest hadde/ door dat Godt alle saken alsoo schickt tot sijnder eere ende glorie.**

**Ten tweeden/ dat niet en sijn de doode die vander werelt ghescheyden sijn vol van ghelooue/ leetwelen ende hope/ door een soo heerlijcken doot/ als is het heyligh Martelaerschap/ die wy behooren te beweenen ende beclaghen/ maer dat wy behooren ons seluen te beweenen/ om dat sy van dese allendighe werelt ghescheyden sijn/ die soo grooten schat niet weerdich en was/ de welcke ons is wt onsen ooghen wech ghenomen/ om ghestelt te worden in brede/ ende verre wt den quaden. Dat onsen goeden ende goedertieren Prince ons verwacht/**



wacht/ ende is daer en tusschen ghelegghen in sijn ruste/  
ende wandelende voor den ewighen Godt/ ende aen-  
ghesien dat wy door clare ghetuyghenisse ons het quader  
bereypt sijn/ laet ons leeren door den woorde Godts/ dat  
ter maer eenen middel en is/ om t'selue te beletten of te  
voorzomen/ dat is door weenen/ vasten ende waerach-  
tich berouwe van ons quaet leuen/ met hope: dwelcke  
doende/ Godt sal sijn gramtschap van ons keeren/ ende  
alsoo ghewapent sijnde (ghelijck den seluen Apostel  
sejt) aenghesien dat wy omringhet sijn van soo grooten  
wolcke van ghetuyghen/ laet ons wech nemen alle last/  
ende de sonde die ons soo lichtelijck beuanght/ ende laet  
ons volstandich veruolghen den loop die ons voor ghe-  
houden is/ merck nemende op Iesus/ t'hoofd ende vol-  
brengher vanden ghelooue/ de welcke in stede vande  
blyschap die hy in de handt hadde/ gheleden heeft de  
pyne vanden cruyce/ de schande niet achtende/ ende is  
gheheten aen de rechter handt Godts. Daerom laet ons  
neerstich aenmercken/ den ghenen die alsulcken weder-  
segginghe der sondaren teghen hem heeft gheleden/ op  
dat wy ons seluen niet en sien verliesen/ ons hert en-  
de moet.

**Coppe**



## Coppe van het vonnisse/ ghegheuen teghen Baltazar Gheeraerts.

**A**lsoo Baltazar Gheeraerts/ geboren van Wille-  
fans in t'Graefschappe van Bourgoignien/ on-  
der het ghebiet des Coninck van Spaignien/ te-  
ghenwoordich gheuanghen bekent heeft. Dat  
hy voorsz. genomen hebbende omme te brengen  
den persoon vanden Doorzuchtighen/ Hooch-  
gebozen Forst / ende Heere den Prince van Oraignien/  
Graue van Passouwe etc. ontrent twee iaeren ende een half  
gheleden / hem begheuen heeft wt den Lande van Bour-  
goignien/ in den lande van Luxemburch / al waer hy hem be-  
gheuen hebbende in dienste van Secretaris des Graue van  
Mansfelt Gouverneur/ aldaer afghedruckt heeft sekere groot  
ghetal van des Graue van Mansfelt secrete pitzier segghelen/  
hebbende oock gheleert contrefeyten de onderteekinghe van  
des seluen Graue van Mansfelt / Om met behulpe van dien/  
acces te maken inden houe des voorsz. Prince van Orai-  
gnien / welcke syne voornemen hy bekent heeft / in Martia  
voorz. schryftelijcken binnen der Stadt Doornick te ken-  
nen ghegheuen te hebben den Prince van Parma / de welcke  
door synen Raetsheere Christoffel d'Alfonleville/daer toe ghe-  
committeert met hem gheuanghen/daer op in Communicatie  
ende onderhandelinghe ghetreden sijnde / hem gheuanghen  
toegheseyt heeft / dat in dien hy sijn voornemen wiste te vol-  
brengen / ende den Van ofte Proscriptie van den Coninck  
van Spaignien teghen den persoon vanden Heere Prince van  
Oraignien wt ghegheuen ter executien brochte/ dat den Co-  
ninck van Spaignien hem soude voldoen/ t'ghene hy by de  
sententie houdende onder meer andere poincten de somme  
van vijf ende twintich duysent ducaten toegeseyt ende belooft  
heeft / Ende dat hy gheuanghen met den seluen Alfonso  
beraetslaecht hebbende opt volbrengen van t'voorz. seyt met  
hem besloten heeft / dat hy gheuanghen hem herwaerts ouer  
int Hof vanden voornoemden Heere Prince soude begheuen/  
noemende hem Fransoys Guion/ een sone van Peeter Guion/  
eertijcs Borgher van Belanzon / de welcke eertijcs omme de

D 2

Religie



Religie omghebracht soude sijn met confiscatie van goeden. Ende dat hy gheuangen onder het schijnsel dat hy van ioncx op de Religie soude toeghedaeen sijn / ende omme de selue sijn ouders ende goeden verloren soude hebben / met alsulcken verbalschten nanre ende met de voorsayde afghedruckte pitzier segghelen ende gecontrasepte onderteekeninghen des Graue van Mansfelt toeganck inden houe des voornoemden Heere Prince van Oragnien soude maecten / volghende welke beraetslaechde opset hy gheuangen alhier int Hof vanden voornoemden Heere Prince van Oragnien gecome is / ende sijnen naent verbalschende / hem ghenoeit heeft Fransois Gupon / ende sulcx int Hof van den voornoemden Heere Prince van Oragnien gecomen sijnde / hem verhoordert heeft op den negeniten deser Maent te coopen twee pistoletten oft corte cinck roers / ende op den tienden deser / op den noen verspiet hebbende int Hof / dat den voornoemden Heere Prince van Oragnien int salette ter tafelen gheseten was / hy gheuangen ghEGAEN is in sijn logement / ende die twee cinck-roers gheladen hebbende / het eene met dry / ende het andere met twee loden ofte balen / weder int Hof ghEGAEN is / hebbende de twee cinck-roers hanghende aen synen riem op sijn cincker syde onder synen mantel / latende synen mantel van sijn rechter schouder neder hanghen / op dat hy niet en soude schynen yet onder synen mantel gheladen te hebben / ende dat hy den voornoemden Heere Prince commende van der tafel / ende wt het salette gaende omme de trappen op te treden naer sijn camer / het een cinck roer oft pistolet met dry looden oft balen gheladen / op den seluen Heere Prince afgheschoten heeft / van welke schote den voornoemden Heere Prince (ten grooten leetwesen van allen goeden Patriotten) ghestoruen is. Welck wesende een valsch verradisch seyt / bedreuen in den persoon van alsulcken personagie als den voornoemden Doorluchtighen Hoochgheladen Vorst / den Heere Prince van Oragnien hoogher memorien gheweest is / niet en behoort onghelstraft te bliuen / maer ten exempelen van allen anderen seer rigoreuselycken behoort ghestraft te worden.

Soo ist dat mynen Heeren de gecommitteerde vanden hooghen ende Provincialen Raeden / ter examinatie ende indicature vanden voors. gheuangen / beneffens den Heere van de gherechte deser Stadt ghecommitteert / ende mynen Heeren de  
Sche-



Schepenen deser stadt wel ende rypelijck ouergheueghen  
hebbende de confessien vanden voorsz. gheuanghen / ende alle  
het ghene in desen te considereren stont / den voornoemden  
Baltazar Sheeraerts gebanghen ghecondemneert hebben  
ende condemneren by desen / ghelept te worden op t'schavot  
alhier voorsz. stadthuyjs opgherecht. Omme aldaer eerst zijn  
rechtter handt daer hy het voorsz. verradisch moordadighe seyt  
niede bedreuen heeft / met een gloopende toeluytende pser ghe-  
schropet ende afghebrandt te worden / ende dat daer naer met  
gloopende tanghen tot ses reysen ende verscheyden plaetsen soo  
aen aermen / beenen / ende t'geen daer sijn lichaem meest met  
vleysch becleet is / het vleesch wtghebrandt ende af ghenepen  
sal worden / ende dat hy daer nae leuendich aen vier quartieren  
ghehouden sal worden / beghinnende van onderen / ende ten  
laetsten hem den buyck opghesneden / ende sijn hert wtgheno-  
men / ende in sijn aensichte gheworpen / ende daer naer sijn  
hooft af ghehouden sal worden: Ende dat sijn vier quartie-  
ren op de Bollewercken vander Vach-poorste / Oost-poorste /  
Kietel-poorste / ende Waterlootse-poorste deser stadt wt ghe-  
hanghen / ende sijn hooft op den School-toorn / achter het lo-  
gement des voornoemden Heere Prince op eenen staeck ghe-  
steelt sullen worden: Verclarende alle syne goeden gheconfis-  
queert / ten profyte vanden Heere. Aldus gheprononcieert op  
t'stadthuyjs der stadt Delft / den veertiensten dach Julij / Anno  
byfrien hondert vierentachtentich.

Ende was onderteeckent.

A. vander Meer.

Des byp.



**D**es vrydaechs den veertiensten vander maent/  
wert hem de wete ghedaen van sijn vonnisse/  
ten eynde dat hy hem soude bereyden om t'san-  
derdaechs te steruen. Hy was metten eersten seer ver-  
baest/ verbloeckende dat hy opt binnen Dole de prac-  
tijcke gheleert hadde/ ende dat hy wel hadde ghewilt/  
gheweest te hebben een aerm ambachtsman/ soo en sou-  
de hy in sulcken onghewalle niet gheualen hebben/ en-  
de beclaechde hem/ van dat hy moest steruen/ niettemin  
nae dien hy de dwaesheyt hadde bedreuen/ dat hy oock  
den last moest draghen/ ende wert de selue Sheeraert/  
t'sanderdaechs gheexecuteert/ houdende ende toonende  
een cloeck ghelaet totter doot.

De mare heeft haer terstont verbrant in alle de ste-  
den/ die de syde vanden vyant hielden: Maer geen van  
alle het oorlochys volck toonde eenich ghelaet oft teer-  
ken van blyschap/ verbloeckende alle ghelijck alsul-  
ken feyt/ in voeghen datter een van henlieden met luy-  
der stemmen seyde voor alle de soldaten van sijn gar-  
nisoen/ wesende inde schanse voor Zutphen/ ende spre-  
kende teghen het crijch-volck van deser syden/ die in  
de loop-schansen waren/ als dattet een schelm feyt  
was/ ende eenen schelm die sulcx volbracht/ gheraden/  
ende beuolen hadde/ al waert synen Coninck selue.  
Ende soo de Priesters in veel steden viere wilden van  
blyschap/ t'ghemeynte en heuet niet willen ghedoo-  
ghen/ dwelcke alsulcken feyt verbloecte: in voeghen  
dat de Canoniken van t'Shertoghenbosch/ siende dat  
sy sulcx niet en mochten vercryghen/ soo sijn sy noch-  
tans by een vergadert inde Domkercke/ waer dat sy  
songhen Te Deum laudamus: ende des auonts daer  
naervolghende/ is daer een schrickelijck onweder op-  
ghestaen van donder ende blixem/ die op de selue kerc-  
ke is gheualen/ ende verbrant heeft/ sonder eenich  
huys



hups vander stadt te beschadighen.

Des vyndaechs den derden dach van Oogstmaent  
naestvolghende/ wert den voorszeyden Prince begrauen:  
Ende hoe wel dat hy in sijn leuen altyts versocht had-  
de/ datmen hem soude begrauen sonder groote costelijc-  
heyt ende staet / soo hebben hem nochtans de Staten  
van Hollant / Zeelant / Vriesslant ende Utrecht/ een  
heerlijcke begrauninghe gedaen/ die sijnder vromicheyt  
ende hoocheyt weerdich was/ ende dat om de gheden-  
kenisse van sijn hooghe seypen/ ende aenghename dien-  
sten die hy de selue landen ghedaen hadde/ het welcke  
heeft gheweest het laetste werck van bermherticheyt/  
aen het lichaem van assulcken/ ende soo sonderlinghen  
persoone/ verwachtende het oordeel dat Godt sal ghe-  
lieuen te doen ouer de ghene die voortstelders ende be-  
leypders sijn van sulcken saken/ hopende dat Godt/vol-  
ghende sijn rechtveerdicheyt / assulcken seypen die soo  
boos ende schadelijck sijn / nimmermeer en sal laten  
onghestraff.









